

## **Primeiru-Ministru Taur Matan Ruak: Sosiedade Timor la distingue entre demokrasia ho tolok no insultu**

**Dili, loron 10, fulan-jullu tinan 2020:** Sua Eselénsia Primeiru-Ministru Taur Matan Ruak sente triste tanba sosiedade timor la intende saida mak demokrasia, no la distingue entre demokrasia ho insultu no tolok, hodi hanoin katak tolok no insultu nu'udar parte ida hosi demokrasia.

***“Ita-boot sira hatene katak iha ita-nia tradisaun, ita-nia kultura trata ema, tolok ema ne’e Maromak bandu, ita tanba demokrasia, ita trata ema, tolok ema ne’e demokrasia ida ne’ebé mak hanesan ne’e? Se uluk ha’u hatene ne’e ha’u la funu tanba no fim para ema tolok arbiru. Ita-nia sosiedade ne’e invés de sosiedade ida sivilizadu, mas sosiedade ida mal edukadu laiha respetu. Sosiedade ne’e só forte se respetu ne’e iha”***, afirma Xefe Ezekutivu hodi hatán ba pergunta jornalista sira-nian kona-ba sosiedade nia preokupasaun ba esbosu lei kódigu penal ne’ebé hatama matéria defamasaun ba kriminalizasaun, hafoin remata reuni-aun ho Prezidente Repúblika iha Palasiu Prezidente, kinta feira ne’e.

Liután Eis Xefe Estadu Maior FALINTIL ne’e afirma, demokrasia hanorin buat di’ak, maibé dala barak ema uza sala.

***“Demokrasia ne’e hanorin buat di’ak simplesmente ita dalaruma uza sala, ita nia nasaun foin tinan 20, entaun dalaruma uza sala, trata ema, insulta ema, ita-nia lei iha Konstituisaun defende direitu fundamental ema ida-idak nian bom nome/nama baik ne’e tenke iha”***, tenik Xefe Governu.

Maske nune’e, Xefe Governu hakarak sosiedade sira fó sira nia opiniaun ba esbosu refere, hodi bele hodi bele hetan entendimentu di’ak entre Governu no sosiedade kona-ba asuntu refere.

Esbosu alterasaun Kódigu Penal ne’ebé hatama matéria kriminalizasaun defamasaun, daudaun ne’e foin iha faze konsultasaun iha Ministériu Justisa hodi fó ba Sosiedade Sivil, Igreja no Media atu fó paraser ruma ba matéria refere, maske foin faze konsultasaun, maibé hamosu ona diskusaun iha sosiedade sira-nia nia leet no iha media sosiál entre pro no kontra. **HOTU/GPM**